



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma : Tir Yimiyim

tiryimiyim@aolima

tir yimiyim

TAPAK 8

Imran Khan-i nübuyimtsü sangdongba sülen Lahore nung curfew benok

Iga Swiatek Indian Wells 3buba round-i iogo



VOL. XX NO. 150 (ADOK 150) DIMAPUR TENTONÜ (MONDAY) METSÜREMI (MARCH) 13, 2023 ₹ 5.00

NABARD-i Rs 1015.39 crore aputsütsü Centre-i atsü-apong kasa kiyimba magizüker



Kohima, March 12, 2023 (TYO): Nagaland nung Financial Year 2023-24 atema priority sector (agriculture) nung Rs 1015.39 crore tashi aputsütsü sentong atongogo ta National Bank for Agriculture and Rural Development (NABARD) Nagaland Regional Office (NRO) Dimapur-i metetdaksü.

NABARD NRO Dimapur-i State Focus Paper (SFP) 2023-24 ajanga Potential Linked Credit Plans (PLPs) yanglu aser iba ya Agriculture Production Commissioner (APC) & DG ATI, R Binchilo Thong-i March 10, 2023 nü saya.

Nagaland indang tasazük 16579 sq.km nung 52% tashi arem lir aser March 31, 2021 tashi nung Net Sown Area ji 3.86 lakh Hectare (Ha) aser cropping intensity 138% aliba bushitetogo.

Priority sector atema Rs 1015.39 crore telemsa:
Farm Credit for Crop Production, Maintenance and Marketing, Water Resources, Farm Mechanisation, Plantation and Horticulture, Forestry & Waste Land Development, Animal Husbandry- Dairy Development, Animal Husbandry - Poultry Development, Animal Husbandry-Sheep, Goat and

Piggery Development, Fisheries & Others (bullock, carts, two wheelers, etc.) - Rs 466.16 crore. Agriculture Infrastructure: Construction of Storage and Marketing Infrastructure, Land Development, Soil Conservation, Watershed Development & others - Rs 18.06 crore.

Agri Ancillary Activities: Food & Agro Processing & others - Rs 29.88 crore Agriculture Micro, Small and Medium Enterprises Investment Credit and Working Capital - Rs 331.84 crore

Agriculture Export credit, Education & Housing - Rs 79 crore Agriculture Infrastructure - Social Infrastructure involving bank credit, Renewable Energy & Others - Rs 90.42 crore.

March 31, 2022 tashi nung PM Jeevan Jyoti Bima Yojana kübok nisung 1,21,123 züluokogo, PM Suraksha Bima Yojana kübok nisung 3,68,649 aser Atal Pension Yojana kübok nisung 2,15,06 züluok.

March 2022 tashi nung PM Jan Dhan Yojana kübok bank account 3,45,049 liasü aser Nagaland kübok yimtsüngtem nung bank 11-i Banking Correspondents/Customer Service Points 274 lapoka lir.

NIA-i ex-minister jabaso tepsetba bushisüngdangtsü NSCN (IM) züngsem ka aser tetsür ka pua lir: Biren Singh

Imphal, March 12, 2023 (Agencies): Manipur nung ex-minister ka jabaso tepsetba ken o National Investigation Agency (NIA)-i bushisüngdangtsü.

Iba ken o nung NSCN (IM) tanishir ana aser Manipuri tsür ka dena lir. Tai tonglokja alir nisung asem rongnung NSCN (IM) tanishir ka aser arishi küm 40 tain tetsür ka tepuokdak lir saka NSCN (IM) tanishir kabo jenshir.

Akoijam Nonganba (Aging) tepsetba anema Joint Action Committee ka den ajurutepdang Manipur Chief Minister N Biren Singh-i iba osang metetdaksü.

"AK Nonganba (Aging) tepsetba anema tentetba JAC-i tanü kü den ajurutepogo" ta Biren Singh-i Honibarnü metetdaksü. "Iba ken o dak sendakba nung

temulung melemi bilemer nisung tasembuba aputsü atema bushitepdar" ta CM Biren-isa ashi.

Taoba Manipur minister asür AK Pilot Langam'er jabaso Akoijam Nonganba indang tasü mangji yaküm February 12 nü angu. Pa asüba nung taitüsü keta liasü.

February 10 nü Akoijam-i pa tetong Thokchom Sonia (40) den külemi kidang nungi apuso ta police-i ashi. February 17, 2023 nü police-i Sonia puogo.

NSCN (IM) züngsem ana rongnung ka puogo aser ka mangur. JAC-i tanen makai lungkak aita aruba agi Akoijam Nonganba indang mang RIMS nung dang lir, ta Biren Singh-isa metetdaksü.

New Delhi, March 12, 2023 (Agencies): Centre sorkari Deobarnü Supreme Court dang atsü-apong kasa kiyimba magizükba indang nenshia metetdaksüogo.

Iba ya 'Indian family unit' tangatetba den meputep kechiyong kibong ta asüba nung kinungbo ka, kinungtsü ka aser tanurtem dena lir. Iba nung kinungbo ta asübaji tebur, kinungtsü ta asübaji tetsür aser tanurtem ta asübaji tena shi nung medemba ajanga jakzükertem lir ta Centre sorkari SC dang ashi.

Indian Penal Code nung Section 377 salatsüogo saka 'same-sex' kibalembutsü asoshi

temeten meshiba ya linük indang ozüngtem kübok temelaba magütsüsüla, ta Centre-isa ashi. Supreme Court nung asüng Hombarnü iba ken o angadangtsü

'Indian Family Unit Concept' den meputep

lir aser iba atema Centre-i "atsü-apong kasatem medemba aser shi nung medembaji 'Indian family unit' tangatetba den medemangtsü makok anunggi LGBTQ+ couples ajanga benokba affidavit magizüksüla" ta metetdaksüogo.

Taoba ita ishika tsünga 'gay couples' pezüi Supreme Court dang 'same-sex marriages' agizüksü aser ozüngi melatsü

atema temepishiba agüja lir.

"Hindu nunger atema kiyimba ya tamangba yimsü sentong ka lir, iba ya tebur aser tetsür ka tsünga temeshi tesentaktep ka lir. Muslim nunger atema iba ya tebur aser tetsür ka tsünga dang inyakba contract ka lir. Anunggi India nung tamangba yimsü aser loktiliba inyaksangshi nung amendaker yangluba legislative policy ajunga okadaki melenshitsu makok" ta Centre sorkarisa metetdaksüogo.

January 6, 2023 nü Supreme Court-i high court balala nung benoka aliba 'same-sex marriage' petition ajak ka kümer parnoki angadangtsü lemteta liasü.

NE yimti 6 nung Smart City mapatongtem merenemteter

New Delhi, March 12, 2023 (Agencies): India kübok Northeast nung yimti 6 tashi Smart City Mission atema shimteta lir saka yimti ajak nung mapatongtem ano metembang lir.

Smart City Mission kübok mapatongtem taküm June ita tashi nung tembangtsü mapang züngzükja lir.

India sorkari 2015 küm Smart City Mission atema yimti 100 shimteta nung Northeast nungi Agartala, Kohima, Imphal,

Aizawl, Shillong aser Gangtok dena lir.

Smart City Mission kübok basic infrastructure renloksü, sensotem libaliro tajungba kümdaktsüsü aser urban development ajungkettsü imlar.

Ajisüaka, Northeast nung yimti 6-i tayongzükka aika ajurur aser itemji ali agitsüba nung timtem, senotsü peria manguba aser COVID-19 wara liasü. Item khuret ajanga taküm June ita tashi

nung tembangtsü aliba mapatong aika meinyaktet lir.

January 14, 2023 nü Union Minister Kiren Rijiju-i ashiba agi smart cities

Smart Cities Mission ya 2015 küm tenzük. Yimti 100 shimteta nungi mapatong 7,742 agütsü aser mapatong 5,002 renemogo, ta Smart Cities Mission indang official website ajanga ashir.

Smart Cities Mission indang mapatong 49% tashi tang teinyakdak lir ta parnokisa ashi.

Opposition maliba sorkar kümra democracy mezüngmeshir asütsü

Kohima, March 12, 2023 (Agencies): Nagaland nung 'opposition-less' sorkar ka akümtsü ama lir kechiyong political party ajaki NDPP-BJP teloktep pusemba metetdaksüogo. Ajisüaka, Nagaland nung political analysts aser lennir aikati iba inyakyim ya magizüker aser democracy mezüngmeshir ta ashir.

NDPP-BJP tsünga menden 40:20 lemsar assembly elections nung toktep aser kümsük tanabuba atema sorkar akümtsü menden peria dang angu. NDPP-BJP teloktep yariba political party temi nübortem atema mebilemer aser parnok ajungtsü asaa inyaker ta political analyst Jonas Yanthan-i ashi. "Assembly nung opposition züngsem ka danga mali kodaser public indang tebilemstü lemsateptsü?" ta Yanthan-i ashi. Political party temi Naga yimjung olemtep nung yariteptsü atema sorkar nungitsü ta ashibaji tema tazütsü atema jembiba olen dang ka lir ta paisa shisem. Social activist Niketu Iralu-ia ashiba agi pai 'opposition-less' sorkar magizüker kechiyong ibaji "opinion-less" ta asüba den kasa lir. Opposition maliba sorkar ta ajaba ya pei nija tajangzük atema sorkar tashi abenba dang lir ta

senior journalist aser writer H Chishi-ia ashi.

"Nagaland Assembly nung MLA 60 dang masü saka Naga nunger ajaki yimjung olemtep atema külemi ola adoktsüla" ta Chishi-i ashi.

"Tesüiba nung opposition maliba sorkar ka liogo saka parnoki kechi inyak? Iba ya ozüng alema lir aser Centre sorkari tebang aitsüla" ta paisa shisem.

2015 aser 2021 nunga Nagaland nung opposition maliba sorkartem küma liasü saka assembly züngsemtemi ano tezüngzüktep magidang opposition sorkar akümbaji tang mezüng asütsü.

Nagaland assembly elections nung election magidang teloktep yanglur NDPP aser BJP ajanga züngsem 60 agi akümba assembly nung menden 37 nung takok angu. NDPP-i menden 25 aser BJP-i menden 12.

Külen, NCP-i menden 7, NPP 5, LJP (Ram Vilas), Naga People's Front (NPF) o RPI (Athawale) ajanga menden anana (2), JD(U) 1 aser Independent MLA 4-i takok angu.

BJP den jungjunga asüngdangtepba sülen ang opposition maliba sorkar atema tatembang telemtetba agitsü ta

tawa tu Chief Minister Neiphiu Rio-i osangbener dang shiogo.

"Iba ama sorkar akümtsü nungdakra asen chief minister aser BJP central leaders-i tebilemba lemsateper lemtettsüla" ta BJP state president Temjen Imna Along-ia metetdaksü.

"Ajisüaka, onoki political party shinga danga sorkar pusemba shidi agütsüsü mashi" ta Along-isa ashi.

"Peoples' Democratic Alliance (PDA) 2.0 nung menden peria dang lir aser tanga political party menüngdaker. BJP central leadership nungi tetuyuba ka marura BJP state unit-ibo opposition maliba sorkar akümba nung shilem magütsü" ta Along-isa metetdaksü.

NCP Legislature Party indang Deputy leader P Longon-i osangbener dang parnoki tatemzükba kecha mali sorkar pusemer aser tatembang lemtet atema atar ta ashi.

NPP tanishirtemi sorkar pusemstü mesüra opposition bench nung amentsü indang telemtetba agitsü ta ashir.

"Election magidang ozü MLA temi NDPP-BJP sorkar pusemra cabinet menden ka agütsüsü ta nangzükka liasü" ta NPP Legislature Party leader Nuklutoshi Longkumer-ia ashi.

CTC nung Digital Discourse in Religious Conflict kaket saya



Noksa nung Clark Theological College indang Prof. L. Imsutoshi Jamir, Dean of doctoral studies, kaket zülur Dr. Tinumeren Ozukum aser Prof. A. Temjen Jamir, Principal den Communication Master aser Doctoral scholars tem angur.

Dimapur, Metsüremi/March 12 (TYO): Dr. Tinumeren Ozukum-i züluba 'Digital Discourse in Religious Conflict: A Postmodern Reading' kaket Clark Theological College indang Principal, Prof. A. Temjen Jamir ajanga Multipurpose Hall, Clark Theological College, Aolijen nung saya liasü.

Dr. Tinumeren ya Clark Theological College nung aliba Department of Communication nung tesayur ka lir. Pai Eastern Theological College, Jorhat, Assam nung Bachelor of Divinity (B.D) azüing aser Gurukul Lutheran Theological College & Research Institute, Chennai nungi Masters degree agi aser Friedrich-Alexander-University, Erlangen-Nuremberg, Germany nungi Communication nung PhD ngua liasü.

Iba Digital Discourse in Religious Conflict: A

Postmodern Reading kaket nung kaket züluri Impact of Social Media on Religious Tolerance indang survey ka agia liasü aser pai amangba yimsü tsütsü digital ajanga maparen balala inyakba indang asadanga liasü.

Pai social media nung tamangba yimsü senzüka yutsüba ajanga timtem ajurubatem aser social media ajanga tamangba yimsü nung kongshiba aser yimyatam indang asadanga zülü.

Pai postmodernism nung theoretical mapa indang asadang, kechiaser postmodernism ajanga tashi temeter nem lenmang tesadamba lapoktsür.

Iba yongji Dr. Tinu-i "A risk-taking Journalism as a new Paradigm" ta sür tatishitsü tasen amshi.

Risk-taking journalism nükjidong ya yimjung bener

arudaktsütsü aser nüburtem talenba nungi salaba nung shilem agiba indang lir.

Tashi temeter shirnok digital religious studies janrar, shirnoki identity aser tamangba yimsü indang online nung lemsatepbatem bushisüngdangtsü janrar aser tongtipang tasüngdangba tem asüngdang, item indang kaket nung shia lir.

Nüburtemi digital content yanglua lemsatepba ajanga tamangba yimsü balala indang kota jangjatsür aser ajungkettsür. Digital Discourse in Religious Conflict: A Postmodern Reading ya ajak asoshi tongtipang kaket ka lir. Iba kaket ya Tribal Development and Communication Centre, Mokochung ajanga adok.

Iba kaket azüngtsü aser osang tejangjaba metettsü atema +91 7085012907 nung tongteprateptsü akok.

Dimapur Government College nung walkathon sentong ayongzük



Dr. Aotoshi, Managing Trustee, Mahatma Gandhi Ashram, Chuchuyimlang, Mokochung ajanga March 11, 2023 nü walkathon sentong ka tenzüktsüba mapang tangokba noksa nung angur.

Dimapur, Metsüremi/March 12 (TYO): Dimapur Government College indang History Club ajanga Mahatma Gandhi indang Dandi March bilemteta March 11, 2023 nü Walkathon sentong ka ayongzükba liasü, kong Dr. Aotoshi, Managing Trustee, Mahatma Gandhi Ashram, Chuchuyimlang, Mokochung tesemdang tongti ka ama dena liasü.

Iba sentong nung pai Dandi March indang jembia liasü. Mahatma Gandhi sülen anidaker nisung 78 ajanga

March 12, 1930 nung Dandi March sentong tulu ayongzükba indang pai rateta ashi.

Nisung aikati Gandhi amadoka aodang kaketshir lanur temi Gandhi tangatetba tanaben amshitsü lungiemshiba ngua temolung asür, ta pai ashi.

Gandhi ya asenok ama meimchir dang masü saka pa ya philosophy aser sobaliba ka liasü, ta Dr. Aotoshi-i ashi.

Telungjem aser azüdokshi anema nokdakba indang teratet lemsatepba mapang pai lanurtem dang social injustice

aser temeden magütsüba anema nokdaksü ajungshia liasü.

Iba sentong nung Meshiang Konyak (B.A.6th Semester Hons) menden liasü aser Meripeni Ngully HoD, Department of History ajanga tarur pela agizükba o jembia liasü.

Iba walkathon sentong nung kaketshir 200 shi, tesayur ti aser IIT Guwahati nungi nisung kati shilem agia liasü, koba Riverbelt Junction nungi tenzük aser Dimapur Government College nung tembang.

Arunachal nung Dibang Valley nung menoknok anak

Itanagar, Metsüremi/March 12 (Agencies): Arunachal Pradesh indang Dibang Valley nung March 12, 2023 nü menoknok magnitude 3.7 anoka liasü.

Osang ajanga ashiba agi, iba menoknok ya Northeastern state ajungalen anüngdang 12:12 ako meta anakba meteta liasü.

Iba menoknok ta Arunachal Pradesh nung Dibang Valley tiyong sür latitude 28.56 North aser longitude 95.91 East aser ali tema nungi kilometer pongu tarok lur anoka liasü.

Tang tashi iba menoknok

nung asüamaba mesüra yiruba osangbo mali.

March 8 nüa Guwahati aser anasa aliba tesemtem nung menoknok magnitude 4.1 anoka liasü.

National Centre for Seismology (NCS) ajanga ashiba agi, menoknok ya Kamrup tiyong sür anoka liasü aser iba menoknok ya Bodhbarneep 3:59 ako nung anoka liasü.

Taoba ita Manipur nunga menoknok magnidute 4.1 agi Noney nung anoka liasü. Iba menoknok ya anepdang 2:46 ako nung anoka liasü.

North Shillong MLA-i Harijan colony nung alirtem anepalutsü ajungshi

Shillong, Metsüremi/March 12 (Agencies): Them Iew Mawlong nung aliba Harijan Colony nungi kibong 342 danga tesemi belener aotsü ya Meghalaya state sorkar mapa lir, ta North Shillong MLA Adelbert Nongrum-i ashi.

Voice of the People Party (VPP) MLA, Adelbert Nongrum-i ashiba agi, iba ken o nung pai atsü-anem makatsü aser ken o angateteptsü asoshi sorkar ajungshitsü nungdaker.

Tawa Meghalaya High Court ajanga state sorkar dang Harijan Colony nung alirtem danga tesemi belentsüba maparen ya election sülen inyaksü shia liasü.

Hopta pezü tsüngta kibong 342 dangaleni belener aotsü state sorkari ken o benokba nung court-i Harijan

Panchayat Committee (HPC) dang telangzüba agütsütsü asüngdanga liasü.

Ajisüaka parnoki pangzük ti renema aliba sorkari magizk aser sorkari blueprint ka yanglu, ta HPC ajanga ashi.

Parnoki sorkar indang blueprint ya shisadangtsü aser nüburtem nungi shisa agitepa telemetba ka agir sorkar dangi arutsü, ta HPC secretary Gurjit Singh-i ashi.

Sorkari item nisungtem danga tesemi belener aotsü tejangraba mali aser Harijan Colony leni aoba atsü ya indoktsüla, kechiaser iba yagi yimti mesü-menangdaksü, ta Nongrum-i ashi.

Mapa inyaker tejangja nisungtem danga tesemi belener aotsü tim aser sorkari ozüing alema arua alirtem den jembitsüla, ta paisa ashi.

Manipur Naga People's Front pur raising day mungogo

Imphal, Metsüremi/March 12 (Agencies): Nokdanga aliba Manipur Naga People's Front (MNPF) pur 10 buba raising day Honibarnü tongtipang tesemtem nung aliba general headquarters, Battalion Headquarters aser Stations nung munga liasü, ta iba telok indang publicity secretary Thomas Newmai ajanga sangdong ka nung ashi.

Iba sentong nung MNPF chairman, John Francis Kasum ya tongti tesemdang ama dena liasü.

Iba anogomung nung shilem ka ama pai party indang nisan asong aser par telok aser lokti ajungtsü mechi takum bendanga agütsür nem akum agüja liasü.

Chairman ajanga Manipur telungi dangartem jenti aitba asoshi khuret lemsatep aser anogoshi nungdakba oset ajunga amai dangalen nungi bener aruba nung state metaloka lir, ta tebilemtsü lemsatepa liasü.

Asen rongsenketzung dangar kabu nung lir aser item oset bener aruba nung local shishilembar madak parnok tajangzük timba agir. Anungji

state atema centre nungi teyari yokba nungi lisopur rongsenketzung tsütsü tajangzük terara dang angur. Per capita income ya national average dang kanga agi tajemba lir, ta pai ashi.

National Highway lenmang yangluba mapa shilem 80 bo outside companies/firms/agencies nem agütsür ta MNPF mendenpubai aitsü.

Water supplies, NDP scheme amala mapa nunga outside company temi tajangzük ajak agir, ta pai ashi.

Outside company temi state nung supply mapa tema agiseptsü meranger.

Item inyakyim ajak ya asadanga, parnoki (outsiders) local economy ajunga amokbanga lir, ta Kasum-i ashi.

Asenoki Manipur kumzüka yunüra kin dak ajemdaker politics asayaba anentsüla, ta pai ashi.

MNPF nükjidong ya pei sasa peria alitsü temeden aser tashi northeast state tenet nung revolutionary telok ajunga tetsüngtai ia apu alatsü lir, ta paisa ashi.



PELABA LEMSATEPER

Mezüngbuba nung, Tulusang Tsüngrem temeim aser taochi asoshi Pa tenüng asanger. 30th Alongtaki Assembly Constituency purtemi tang agi ashi-ashia anabenbuba tashi nenok tenüng nung yimten mapa inyaksü asoshi kü dak temulung lemteta maongka agütsüba asoshi nenok ajak dang kanga pelaba metetdaksür. 14 buba Nagaland Legislative Assembly nung 30th Alongtaki Assembly Constituency tenüng nung shilem agitsüba shi takba ni asoshi akhüm aser maongka tulu lir.

Ano kasa mapang nung, 30th Alongtaki BJP Mandal nung shilem agirtem aser tongti tentettem den teyaritepertem ajaki sarasadem, rongsen aser nübo agi bendanga agüja ni yariba asoshi kanga pelaba nenok ajak den lemsateper. Election mapang tepiyong nenoki timtem lendong ajak tizükteta nokdaktetba aser ajungshiba mapatem ajanga teti asoshi ni kanga ajemaludaktsüogo.

Nagaland BJP nung kü lenisüba dak temulung lemteta election nung shilem agitsü maongka agütsüba atema Hon'ble Prime minister, Wb.Narendra Modi Ji, National BJP President, Wb.JP Nadda Ji, Hon'ble Home minister, Wb. Amit Shah Ji aser Hon'ble Chief Minister, Assam Wb.Himanta Biswa Sharma ji nungertem ajak dang ni' kanga pelaba o lemsateper. Ano, election maparen ajak nung BJP Nagaland State Unit nung lenirtemi anir züngsem ajaki anibelem arema yaritepba asoshi parnok danga kang pelaba metetdaksür.

Ano, kü den toktepsang JD(U) candidate Er. J. Lanu Longchar-ia election nung adok-madok ta mali, pa tajungtiba agi nübortem tenzüksü sayua tangtetba tajung agi toktepba asoshi pelaba shisemer. Tarutsü nung pai inyakba mapa ajak nung tajungtiba takok aser temoatsü dena liangma.

Election maparentem tembangaka, ano maneni asenok constituency aser state atema ni khuretsa bilema inyakba mapatem ajak nung nenoki kü den yaritepsü ni kanga mepishir.

Nenoki bendanga agüja inyakba mapatem ajak kü mulungjang nung teti alitsü aser iba jagi nenshipet nenshia nenok tajungba tenzüktetsü asoshi ni ajungshidaktsüsü.

Kanga Pelar aser Tsüngremi asenok ajak moajangma.

TEMJEN IMNA ALONG



International Women's Day nungtem nung March 12, 2023 nü Rajiv Chowk, New Delhi nung Border Security Force (BSF), Delhi Police aser tanga organisation balala nungi tetsürtemi bike rally nung shilem agiba noksa nung angur.

Centre sorkari kasa o kasa kibong akümba agizüktsü memelunger

New Delhi, Metsüremi/ March 12 (Agencies): Amongnü Centre sorkari affidavit ka ajanga Supreme Court dang India nung kasa tetsür o tetsür na mesüra tebur o tebur na kibong akümba ozüng ajanga magizüktsü metetdaksüogo.

Centre sorkari Supreme Court dang, kibong mekümi tetsür o tebur na külemi ki ka nung aliba aser kasa tetsür o tetsür na mesüra tebur o tebur na shi nung medembaji tangbo ozüng alema masü, ajisüaka ibaji India nunger kibong den medemangtsü makok, kechiyong India nunger kibong kaji-kinümbu ka, kinüngtsü ka aser tenati sosemba tanurtem lir, ta shia kasa tetsür o tetsür na aser tebur o tebur na kibong akümba ozüng ajanga agizüktsü atema mepishibaji magizüktsüla, ta metetdaksü.

Kasa o kasa kibong akümbaji India nunger loktiliba aser tangatetba den meputep, ta Centre-i affidavit nungji shia lir.

Centre-isa Supreme Court dang, "Kiyimba aser kibongji India nung kanga tongtibang loktiliba reju ka lir, koba ajanga asen loktiliba züngsemtem

rongnung nung security, teyariteper aser amalitepa adokdaksür. Iba denji külemi tanurtem mesüa aniteter," ta metetdaksü.

Centre-isa, tebur ka aser tetsür ka kibong akümbaji personal laws mesüra codified laws kübok lir; item ozüng rongnung Hindu Marriage Act, 1955, Christian Marriage Act, 1872, Parsi Marriage & Divorce Act, 1936 mesüra Special Marriage Act, 1954 mesüra Foreign Marriage Act, 1969 lir, ta metetdaksü.

Kasa tetsür o tetsür na aser tebur o tebur na tsüngda kibong akümsü atema temelaba agüja ozüng agizüktsü atema Supreme Court nem temepishiba ken o aika agüja lir; Hombarnü Supreme Court-i maneni item temepishiba ken o aika angadangtsü.

Temepishiba ken otemji Chief Justice DY Chandrachud den justices- PS Narasimha aser JB Pardiwala nungeri akümba bench-i angadangtsü.

2018 küm Supreme Court Constitution bench kati, tetsür o tetsür na mesüra tebur o tebur na tangatetep nung miima shi nung medembaji ozüng alema masü, ta obendang agüja liasü.

Budget senden tanabuba shilem atema Opposition senden amentsü

New Delhi, March 12 (Agencies): Budget senden tanabuba shilem tenzüksü mapang ana nung lia Hombarnep Opposition party balala nungi lenirtem senden mena onük balala nung sorkar anema nokdaksü atema asalentong yanglutsü.

Taruba budget senden nung Opposition lenirtemi sorkari tim masüba nung bushisüngdangba agency balala amshiba, Adani Group ochimashi ken o, China den arrtsülen mepetmesü, osettsüset jenjang atuba aser mapa manguba tebilemstü onüktem densema onük balala nung sorkar anema nokdaksü, ta osang ka ajanga metetdaksü.

Hombarnep 10:00 ako nung opposition lenirtem Rajya Sabha nung Opposition Lenir, Mallikarjun Kharge indang office (Parliament complex) nung senden amentsü.

Iba senden tembangba sülen

Congress MP tem Congress Parliamentary Party chairperson office nung adenshia senden temeja ka amentsü.

Congress-i maneni Adani Group dak sendakba ken o ya joint parliamentary committee (JPC) nem bushisüngdangdaksütsüla, ta takhangba agüja arudar.

Congress MP, K Suresh-i, Parliament nung party-i maneni Adani-Hindenburg onük süoktsü, kechiyong sorkari tang tashi telangzüba magütsür, ta metetdaksü.

Samajwadi Party, Left parties aser DMK party temia, sorkari federal inyakim anema inyakker aser reju balala tim mesüi amshir, ta aitsüogo.

Parliament nung Budget senden ya January 31 nü tenzüka liasü aser ita ka shi thinenba sülen budget senden tanabuba shilem tenzüksü aser April 6 nü tembangtsü.



March 12, 2023 nü Mandya District nung Ato kilonser, Narendra Modi-i Bengaluru-Mysuru Expressway den tanga projects semzüksüdang tangokba noksa nung angur. Kasa noksa nung Union Minister for Road Transport & Highways, Nitin Gadkari aser Karnataka Chief Minister, Basavaraj Bommai nata angur.

Karnataka nung gol ana aketba sorkar nungdaker: PM Modi

Bengaluru, Metsüremi/ March 12 (Agencies): Amongnü Ato kilonser, Narendra Modi-i, Congress aser tanga opposition party temi kanga mazüngi pa atema leper atur, ajisüaka pabo linük terenlok atema aser sensakertem atema meranga inyakker, ta ashi.

Taküm May ita nung Karnataka state assembly elections agitsü lia pai, Karnataka nung terenlok mapatem kanga kera inyaksü atema state nung gol ana aketba sorkar nungdaker, ta ashi.

Amongnü Mandya District nung kilometer 118 talang Bengaluru-Mysuru Expressway project semzüksüba sülen Modi-i,

"Linük renloksü aser nüburtem renloksü atema gol ana aketba sorkari meranga inyakba mapang nung Congress aser parnok pusemertem kechi inyakker? Congress-i Modi atema leper atutsü bilemer," ta ashi.

"2014 küm jakdang Centre nung Congress-i aniba teloktep sorkarji nisung tapu balalai pusema liasü. Sensakertem aser sensaker kibongtem samatsütsü atema parnok ajak inyakker," ta pai ashi.

"S e n s a k e r t e m ajungkettsütsü aser terenlok indang sen crore aika Congress sorkari auya. Congress-i kodanga sensakertem timtem atema bilemja maliasü," ta paisa ashi.

Iba sentong nungji Karnataka Chief Minister Basavaraj Bommai, Union Minister- Nitin Gadkari, Pralhad Joshi na aser Mandya nungi Lok Sabha MP, Sumalatha Ambareesh nungera liasü.

Old Mysuru region kübok Mandya district ya Vokkaliga nütsüng teimba aliba district lir; iba district ya JD(S) aser Congress junga amenoka aliba tesem ka lir, ibayongji BJP-i iba tesem nung party tashi aittsü atema rangloker inyakker.

Taoba mapang Karnataka assembly election ana nung single largest party ji BJP liasü saka Old Mysuru region nungbo parnok menden aika menguteti liasü.



TIR YIMYIM YIMOBILEM (EDITORIAL)

DIMAPUR TENTONÜ, METSÜREMI (MARCH) 13, 2022

Election ya rara masü

Yimten nung ozüng yanglutsü aser yimsüsütsü atema yimsüsür shimba 'Election' ya azü poka raraba rara tongpang ka masü saka yimsüsütsü maongka aginertem rongnung nübortem nem shimdaksütsü asoshi toktepba sentong ka lir. Aji oda, election ya raraba sentong ka masü saka takok angutsü toktepba football aser volleyball asayaba asaya ama ka dang lir. Atangji, alima nung meimchirtem rongnung takok angutsü tokteper asünungji khenkhenbo mepelateptsüsa adoksüsa akok saka takok angutsü toktepba asaya ka nung takok mangutsü tsüba tangar den rara menara, ibajibo asayaba nükjidong anema inyaker asütsü. Election ya balaka ozüng yanglur yimsüsür tatar shimtsü asoshi ayongzükba sentong ka lir, anungji election nung adokertemiang nisung tepsetba, nisung dak azükba, tangar kiojen raksatsüba, ashi-auyaba, rakzükratemba, ochimashiba aser senyong vote ayokba mapatem anema ozüng latettsü. Item ama ozüng raksaba anema ozüng yanglutsü asoshi ozüng yanglur shimtsü atema election agir. Ajisüaka, election nung tokteperitem anir tasemer aser teyariteperitem ajaki takok angutsü mechi ozüng raksaba mapa inyakra, nübortem tetsübu melii yimjung nung alitsü atema ozüng yanglutsü atema shimertemji ozüng raksar akümer. Tanü asenok aser asen lima tia ya bilemdangra, tashi ajak agi ozüng raksartemi ozüng yanglur shimba lima ka kuma aoba angur. Tang aser tarutsü Naga lima aser talisa Ao lima asoshi tebilemstüji aji lir. Aji oda, tanü yimten nung yimsüsür shimtsü asoshi election agiba yimya ya asenok arogo mapatem den medemdangra, arogo nung sannüker inyaksü asoshi tiyazü jembia nükta pangtaa jajaritem tiyazü jembia nükta pangtaa jajar ka parnok sannüker asütsü shimtsü meranger amai lir. Tiyazü agi ochi kuma jembitetba aser Tsüngrem tenüng tetshia tashiyim mapa inyakba aser ozüng raksatsü tatidaka matidaki inyakba aser ozüng raksaba agi akseta bilemstü melen mapa tajung ka inyaktet ama nümadanga bilemba nübortem aser yimsüsürtem aliba limaji kechi lima asütsü ? Iba limaji asüng kechi akümtsü ? Iba limaji koloni aoer ? Item chirnurtem jagi asüng pei tsüraburtem mapang aser parnok taküm yimya indang kechi jembitsü ? Tanü asen lima nung atalokba indang osangkakettem nung adokba ocet aser osangtem aser sangro mejemertemi mejemba sangro aser kenteneritem mejema atenba kentem ya taruba putu nung 'text books' kümer tanü asenoki akhi Indian aser European otsütem azüngba amai azüng nungbo koda asütsü ? Item otsütemji asen chirnur aser semchirse nurtemi nümadanga azüngtsü asü ? Tanü asen lima nung shisabolutsüka, election mapang nung dang masü saka election temer külena election mapang tsükchitepba nungi adokba rara manenba ya koda ? Aji oda, election mapang nungang tesashiba aser election temer külenang tamajungba ta, talisa, yimer o yimer na tsüngda tashiyim amshia raratepba mapa ya anentsüla. Iba yagi asenoki Khristan yimsü menentsür aser tangar yimsü amangertem tsüngdang asenok menüdong akümer. Iba amai sen aser tashiyim amshia agiba election ajanga akümba government nung alirtemi senotsü chija tashiyim mapa inyaker nübortem meimtsü na ? Election mapang pei vote ayoker aser tashiyim amshirtem dang meima parnok shilu manemdang teyari angutsüsa mozü ki tajung yanglutsütsü asü ? Election mapang sen chitsür aser tashiyim amshirtem ayongayonga jajatsüsa yimti yimdong ajak topur jungdakja lenmang yanglutsütsü asü ? Vote yoka achir aser tenük amur tashiyim amshir chirnurtem sen meindoki kaketshisatsü tajung ngua azüngtsü atema school aser college tajung yanglutsütsü asü ? Ozüng raksartemi koda ozüng raksartem dang meima anepalutsü ? Ibaji asenok ajaki arokaroka shisadangdi aser ozüng raksar masü ozüng yanglur aser ozüng benschir akümtsü merangdi. Atangji, election ya tetsübuttsü rara tongpang ka ama masü saka pei tangatetba aser sempet amshia yimten nung pelatepa shilem agiba tongtibang mapang ka sädaktsüdi. Iba jagi dang Nagaland ya nüchi pur aliba nüchi lima ka kumadoktsü.

OLEMSABANG

IBA LIMA NUNG TAJUNG O TAMAJUNG NA MEDEMDANGA YAMAI ATALOKYONGA Aoba Angur

-R.Imkong Lkr, Aolijen Mepu, C.T.C, Mokokchung

(Yashi adok nungi...)

- | | |
|--|---|
| <p>26. Asen lima yimtsüng kar nungibo yimsüsür tajung karbo adoker, item yimsüsürtem rongnung shirnokisa pangdak kübok timi litetter aser Tsüngremi mulungba ama jajar, parnok tia koda tajung, parnok alima nung tatsüka alidanga jangratema lir ano Tsüngremer yimli nungjia parnok senmanger akümtsü.</p> | <p>26. Saka alima yimsüsürtem rongnung shirnokisa Tsüngremer pangdak indang memeteti lidir parnokji koda tia maka, tanü parnok alima nung jangratema wangshia alibaji Tsüngremi agütsüba maongka nung alir ta memeteti tapi agi lidir, parnok dangi Tsüngremer tajaba ola ka arutsü aser pa asoshi iba tajaba olaji tatembang alitsü.</p> |
| <p>27. Tanü iba lima nung tulurtem aser takartem asoshi jangratemtsü mapangji ibai lir, kechiyong parnok ket nung ali rongsen peria alinungji parnoki ali tulu-lu aika alidena ayur, aser yangji ki tajung sen aika alangba kitem yangludena ayur. Aser pai pa kinüngtsü shitakba dak alaka ano "part time" khen atema ki anepalutsü ta ser tepur tajung aiertem sen talang tashi agütsür ayur, aser pai yangji chiyongtsü tachi tajemtsü peria yutsür mapang shia ki anepalurtem tu komasa aliar ta semdangyonga aor. Oda parnok asoshi alima nung kotakji ibajiang asütsü alitsü ta bilemstür. Kechiba ta süra parnok ket nung makatsü kecha maka jangratema liyonga aoba angur.</p> | <p>27. Saka tanü ta ajaba mapang nung tulurtem aser takartemi parnok ali rongsen peria aliba yong tanübo parnok makatsü kecha maka nungji tebilemstü kecha mekai jangratema liteper. Saka kenü anogo pa dangi tajaba ola ka arutsü, iba tajaba olaji alima nung aliba Doctor temibo maneptsütettsüsa tashitak tulu ka agi atonger, aser iba anogo nungjibo par tezüngatsürtemia sembatsüsa akümer, aser par tezüngatsürtem rongnunga karbo iba kasa tashitak jagi tonger pa dangi teyari meshia arur, saka parnok asoshi kecha teimla mekai akümer. Aiatai parnok asoshi tepenjem mapangji joko tonga arudar ta metetdangma.</p> |
| <p>28. Iba lima nung nükmerem aliba sempet ya ajak dang tamajungtiba sempet rongnung ka lir. Tatishitsü agi külem studentpurtem rongnung kati lesson kanga meranga azüngba ajanga pai par medemertem dang nungi tematiba jenjangji ngutet, iba jagi par medemertem aser tesayurtem nungi tenüngsang aser tetushi tulu angur, oda par medemertem rongnung aikati taruba kümjibo parnokisa takok tajungtibaji ngutettsü mechi nung lesson kanga merangasa bushitep, saka pakümjia par medem nungba tusa tematiba jenjang nungtu takok ngutet. Iba ama lesson kanga meranga toktepa bushitepaji tajung nung tenük meremba ta ajar.</p> | <p>28. Saka tenük meremba ya tapu ana asünung tangar ka mashi kushi nung tamakok ngudaktsütsü mechi nung külaka mapa tamajung inyakba dangji tenükmerem tamajungla ta ajar. Aikati pei medemer ashioptsür pei jenjang tajungba kümnüdang medemer tsüngda nung mangtetep tulu adoker, ibaji mesüka karibo pei merangdangba nung takok tajung mengutetba yong pei medem nungba shibai temaba jenjang nung takok ngutet pa nem tu miim mozü chidaktsür sädaktsür, iba dangji nisung tepsetba ta ajar. Aser ano kari pa mesüra la tu yimya tajung agi mesüzüka tesem kati anir or tepseta doktsür, mesüra ayong tarok kari anir or yangji nungokja arakseta sädaktsür, mesüali ano karibo pa mesüra la tu picnic kari anir oadang lenmang nung gari brake fail atemer longbang nung tsükseta sädaktsür. Oda nisungi mapa tamajung inyakdi ta asünungbo lenmang aisü nungi mapa tamajungji inyaktet. Saka Tsüngremi ashir, mangyang kü meyong ni shia agütsütsü ta temeshi lai ajanga ashir.</p> |
| <p>29. Koba mapa südir süaka kari kenü anogo langka miimshiainyak nung mapang memenui tang iba mapaji jungkai madokiang malir ta Tsüngrem o-i ashir. Yamaji koba mapa aseni miimshi, iba mapaji kenü ita aser anüi putettsür, mesüra tzünglui ajatettsür ta shin o jembia aru. Anungji koba mapa aseni miimshia inyaktsü bilema ali aji metenzükdang anenadokbaji tajungba.</p> | <p>29. Nisungtem rongnung kari mapa tamajung inyaktsü bilema tenzükdang aiben tamakok ajurur, kechiba ta süra aseni mapaji miimshia inyaktsü bilemer asünung ibaji putetdang shibaibo nüma tanga litettsü. Aser koba mapa aseni miimshia inyakogo, iba taiji peisasa abentsüla. Anungji item timtemji atalokdang pei sasa angateta aremzüka abentsüla ta shisadangang.</p> |
| <p>30. Kenü anogo aseni kar dang mapa tajung mesüra tamajung ka inyak nung kenübosa iba mapa indangji asen dangisa meyipa shilangtsü. Anungji tajung süali, tamajung süali Tsüngremi o bendangtsü sentsüh tsüa lir ta metetdi.</p> | <p>30. Kenü anogo aseni langka mapa tamajung ka kar dang inyaka lira pa mesüra la jagia iba mapaji teti bilemteta alitsü, aser kenü anogo mapang shitak ka tenjira pa jagia kasa mapaji kubzüka asen dang inyaktsü. Anungji teti mapa tajung inyaktsü bilema liang ta Tsüngrem o-i ashir.</p> |

Kerala nung Arogoi Khristantem anemba jilushi ka nokdangtsü akhanger



'Kakkukali' jilushi aidang tangokba noksa nung angur.

March 12, 2023: Kerala state nung Kerala Catholic Bishops' Council (KCBC)-i, 'Kakkukali' jilushi ya Kerala nunger sobaliba tenüing menüktsüba jilushi lir, aser iba jilushi ajanga Khristan yimsü tenüing menüktsür, ta shia iba jilushi nokdangtsü takhangba agütsüogo.

Malayalam nunger kaketzülur, Francis Noronha indang otsü nung ajemdaker yangluba 'Kakkukali' jilushi ya lanur 'nun' ka otsü aser lai convent ka nung timtem balala den tayongzükba jenti ajangshiba jilushi lir.

Kanga tashishitsü aketba jilushi aser puti otsü raksatsüba jilushi tushiba ya khenyongi magizükteter, ta KCBC-i

metetdaksü.

Aikati aitsüyonga jilushi director, Job Madathil-i iba jilushi sayatsü, ta sangdongogo.

Kerala Catholic Bishops' Council (KCBC)-i state sorkar dang Malayalam nunger jilushi 'Kakkukali' ajanga Khristan yimsü, tamangertem aser convents tenüing menüktsür, ta ashi.

Tawa Kochi nung KCBC Tir, Cardinal Baselios Cleemis leniba nung putirtem aser Arogo lenirtem senden amenba mapang nung 'Kakkukali' jilushi aitsüogo aser iba jilushi sayaba ajanga Kerala nunger sobaliba tenüing menüktsür, ta parnoki bangjema liasü.

KCBC züngsemtemi, jilushi aser ken o zülü balala ajanga

loktiliba nung temelenshi adokdaksür aser loktiliba ajungkettsür, ajisüaka kanga tashishitsü aketba aser puti otsü raksatsüba jilushi yabo khenyongi magizükteter, ta parnoki bangjema sangdong ka agütsü.

KCBC-i sangdong ajanga, iba jilushi ajanga loktiliba tenzüker nuns meyrjang aika aser Arogotem melung yirutsüogo; state sorkar indang international drama festival nung iba jilushi züngokba ya onoki aitsür, ta metetdaksü.

Ajisüaka iba jilushi Director, Job Madathil-i, "Iba jilushi ya tesem 15 nungbo sayaogo, ajisüaka tang ajungbena iba jilushi anema ola adokba ya ni mangateter," ta metetdaksü.

Franklin Graham indang crusade nung nisung aikati Khrista agizük

March 12, 2023: Tawa sayutsüingir, Franklin Graham indang evangelistic crusade ka nung Vietnam nunger nisung meyrjang aika aden aser aikati pei menen toktsür Yisu Khrista agizüktsü teletetba agia liasü.

Taoba hopta tatembanglen Franklin Graham leniba nung par team-i Ho Chi Minh yimti nung aliba Phu Tho Sports facility nung crusade ayongzüka agi aser anogo ananü Spring

Love Festival nungji nisung meyrjang aika aden.

Vietnam ya communist linük ka lir, saka iba linük nung Yisu Khrista osangtajung lemsateptetbaji sayatenya tuluka liasü.

Kasa sentong nungji Franklin leniba nung loktii sorkar ketdangsertem atema sarasademja liasü.

"Laishiba nung tuyua aliba ama onoki nokdaker sorkar

ketdangsertem atema sarasademtsüogo. Tsüngremi iba linük nung lenirtem len anitsü aser linük moatsütsü atema onoki longjemer sarasadem," ta Franklin Graham-i metetdaksü.

Sorkari iba sentong agitsü melaba ajanga Vietnam nunger meyrjang aika iba sentong nung arua aden aser aikati Khrista nem taküm bendanga agütsü.



March 12, 2023 nü Clark Theological College, Aolijen nung CTC Principal, Prof. A. Temjen Jamir-i Dr. Tinumeren Ozükum-i züluba kaket 'Digital Discourse in Religious Conflict: A Postmodern Reading' sayatsüba sülen tangokba noksa nung angur. Kaketzülur Dr. Tinumeren ya CTC nung Department of Communication nung tesayur inyaker. Pa ETC, Jorhat nung Bachelor of Divinity (B.D) azüing, Gurukul Lutheran Theological College & Research Institute, Chennai nung Masters' degree azüing aser Friedrich-Alexander- University, Erlangen-Nuremberg Germany nungi Communication nung PhD ngua liasü. Iba kaket publisher ji Tribal Development and Communication Centre, Mokokchung lir.

ANOGO ABEN TSÜNGREM DEN

Tesendaktep

1 Tesa. 4: 1-8

ATSÜABUNG MEDEMBA - KHRISTAN TANGATETBA

Aser tena prongla mangsa liasü, nisung o pa kinüingtsü na, aser maktepi liasü. Lipok 2:25.

Laishiba nung iba o jakdaka dang ashiba jagi Tsüngremi atsü-abung medembaji Tsüngremi saklokba mapa ta sayur. Pai ibaji yanglu. Idakji kecha tamajung mali. Adam aser Eva mangsa liasü saka kecha maktepi liasü. Temenen malidanga, atsü-abung medembaji liasü. Tsüngremia ibaji junger ta ashi. Ibai taaktsü o ka masü.

Ano item O yagi satitsü atema Tsüngremi atsü-abung medembaji yanglu ta sayur. "Anungji nisungi pei tebu aser pei tetsü toktsür, pei kinüingtsü den sentepa alitsü; aser tena shi ka dang alitsü" (Lipok 2:24). Iba telungjem nem Teyanglur -Tsüngremi ozüing aser temoatsü agütsü. "Aser Tsüngremi parnok moatsü aser Tsüngremi parnok dang ashi, "Soyapokyang, aser jenti renang, aser alima süngdakja aji azüokang" (Lipok 1:28).

Atsü-abung medemba sempet ajanga Tsüngremi meimchir taküm tasen yanglutsü agütsü. Satiba kübok tepela aser jangratema shilem agitsü Teyangluri Pa shisatsü nung iba nüingdak ya yanglu. Asenok temenen nung tsükba ajanga atsü-abung medembaji menena kümdaktsü. Saka asenoki Pa sempet tajung mejungi amshiba temenen asoshia Yisu kangki nung asü.

Temeim Kibur, onok tebur aser tetsür yangluba asoshi Ne tenüing asanger. Iba atsü-abung medemba senti sempet Nai mulungba nung amshitsü onok dang yariang; Yisu tenüing nung. Amen.

Asür, Whitney Houston indang osangtajung kensep ka sayatsü



Whitney Houston (abelen) aser lar medemer CeCe Winans nati külemi ken ka atandang tangokba noksa nung angur.

March 12, 2023: Nüingtu kentener, asür Whitney Houston indang osangtajung kensep ka March 24 nü sayatsü; ken trok aliba kensep nungjagi "He Can Use Me" ken bo Houston arrshi küm 17 dang asüba mapang nung record süa liasü.

Whitney Elizabeth Houston ya 2012 küm February 11 nü asü; la sür küm 11 jungogo ajisüaka maneni la indang kensep ka sayatsü.

"I Go to the Rock: The Gospel Music of Whitney Houston" kensep nung asenoki kodanga mangashidangba ken trok keta lir. Iba kensep nungjagi mezüingbuba ken "He Can Use Me" kenbo sayaogo aser aikati sapua anagadar. Iba kensep ya March 24 nü sayatsü.

"He Can Use Me" ken record asüba mapang nung la

arrshi küm 17 dang liasü. Sangdong ka ajanga ashiba agi, iba kensep denji külemi la indang documentary TV special aser DVD sayatsü.

Grammy award angur, Houston medemer aser osangtajung kentener, CeCe Winans-i ketdangsüa agiba sentong nungji documentary sayatsü. Iba documentary ji Whitney Houston-i mezüing lokti matsüingdang osangtajung ken tena tenzüka mapang nungi lai osangtajung ken balala atenba indang documentary lir.

March 24 nü kensep tasenbaji tongtibang music streaming platform ajak nung sayatsü aser DVDs ji The Gaither Music Group ajanga alitetsü.

Iba kensep alitsü atema Gaither indang website ajanga jelia mekazüka yutetsü.

**AO OSHI ANGAZÜKDAK:
TANÜ ANGAZÜKTSÜBA OJANG**



Peliteta

(v) pokraka, nongteta adok (swell out, belly out)

* Samarobai tepok **peliteta** adoker senzü.

Pelizük

(adj) awakba, tebangmechi mesong (protrude lips, pout)

* Lai jashidang tebangmechi **pelizüka** sayur.

OLONG PAITEP # 6454

1		2		3		4	5			
				6						7
		8								
9				10		11				
			12						13	
						14				
16										17

TIPIEN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S_ _ _ i - (3)
- 9. Nisung rongnung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong talemangliba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Kenyongi majinü - (5)
- 13. Rong kanga lulu - (5)

OLONG PAITEP # 6453 TELANGZÜBA

TIPIEN :

- 1. Tanga, 6. Wara, 7. Rajang,
- 9. Anük, 10. Jenjang,
- 11. Alar, 14. Ngashi, 15. Nala,
- 16. Mechi.

LANGTSÜNGLEN :

- 2. Anga, 3. Yabang, 4. Tarok,
- 5. Orak, 8. Ainer, 9. Anema,
- 10. Jabili, 11. Among,
- 12. Miim, 13. Anem.



**ALOKBA O SOBANGBA NA ONÜK KA
JANGJASHITEPER :**

Alokba : Ya temba, tawa tanü ka election mapang nunga perokshi ta, ano tesayurtema perokshi ta jembibaya kechila aka?

Sobangba : Kechi perokshi ta jembir ar to, oh ni angatetogo, ya perokshi masü "proxy" vote ta, "proxy" teacher ta asüba ya na, yamai ati...tamasa proxy vote ji kechi dang ajar ta sürapang, tan election nungto Ao lima, Naga lima ajungalen tangar indang voters' slip rakzüka, public ang masü tenzüksürtema kanga mezümeküma tangar indang vote ajenbato koda, ano proxy teacher ta asübaya, yidak-yimtsüng nung posting atartemi pei melena tangar qualification agi matongyonga yimdak ketdangsür den angatetepa ayuba, tangar melen ayuba tesayur dangji proxy teacher ta ajar ati... Tsüngrem tenzüka Town tulu nung alirtema mejembutsü amaia karbo lirkoti.

Alokba : Angatetogo, asen limabo majungja ni!!!

Lilir : WhatsApp

Arunachal nung ENNG telungpur 15 temai adok



Itanagar, March 12, 2023

(Agencies): Deobarnü Arunachal Pradesh nung Eastern Naga National Government (ENNG) president-i anir parnok 15 tashi temai adokogo.

Iba sentong nung Chief Minister Pema Khandu aser Major General Vikas Lakhera, Inspector General Assam Rifles (North) na aden.

"ENNG telungpurtem temai adokba ajanga tanga telungpurtema temai adoktsü ajungmesotsü. Assam Rifles-i maneni mesüzüka aruba aser ozüng alema mapa inyakba anentsü ayongzüka sülen parnok temai adok" ta sangdong ka nung metetdaksü.

"Telungpurtem temai adokba

ajanga Assam Rifles-i northeast nung yimjung atema inyakba mapa tali jangjar" ta AR sangdong nungsa shia lir.

Parnok temai adokba ajanga TCL region nung tensa süngjemer aser Southern Arunachal Pradesh nung telungpur maparen nung tetsükdaksü ajurur, ta parnokisa metetdaksü.

"Temai adokba telungpurtem sorkari akokba tashi yaritsü nangzüko" ta Assam Rifles-isa ashi.

Eastern Naga National Government (ENNG) ya January 2016 nung R. Stephen Naga-i anir tentet. Eastern Nagaland nung "Naga army" tashi itdaksütsü aser Myanmar nung telungpur telok balala den

tesentaktep yanglutsü nukjidong nung ENNG ya tentetba liasü.

ENNG telungpurtemi Arunachal kübok Changlang-Tirap-Longding nung mapa inyaksangshir.

February 25, 2023 nü Arunachal Pradesh aser Assam police külemi mita aodang Eastern Naga National Government (ENNG) tanishir 3 apu.

Telungpurtemji Assam kübok Tinsukia district nung apu aser parnokji Chailai Ngodam, Shewang Hodong aser Hongam Ngodam nunger ta jangjaogo.

Iba sülen Arunachal Pradesh kübok Changlang district nung ENNG tesepe ka makdok aser prangpong-injang aika nguteta liasü.

Arunachal Pradesh Students' Union-i mokdang agiener

Itanagar, March 12, 2023

(Agencies): All Arunachal Pradesh Students' Union (AAPSU)-i Deobarnü mokdang ayongba magitsü osang metetdaksü.

March 5, 2023 nü AAPSU aser Districts Student Union (DSUs) balala külemi senden amendang Arunachal Pradesh mokdangtsü telemtetba agia liasü.

"Arunachal Pradesh Public Service Commission (APPSC)

paper leak atema 'Null and Void' lemtet magizüker kechiyong tang ketdangsür kümer aliba chichiba candidate tem timtemtsü" ta AAPSU aser DSUs ajanga metetdaksü.

Taoba mapang mokdang ayongdang AAPSU ki raksatsüba aitsüba den iba mapa inyakertem ozüng tapet agi merenshitsü takhangba agüja parnok mokdang ayongzüker.

Arunachal Pradesh indang

Home Minister-i 13 Charter of Demands atema lemtet agiba indang shidi ka jangjatsüsüla ta AAPSU-isa takhangba agütsü.

Parnokisa taoba Asst. Controller of Examination, APPSC Tumi Gangkak taitüsü keta asüba atema bushisüngdanga temeten agütsütsü takhangba agütsü.

AAPSU-i state sorkar dang March 10, 2023 tashi nung item mapa inyaksü mapang züngzüka liasü.

Manipur nung lanur ka ket nung S-Plus tablets aika apu

Imphal, March 12, 2023

(Agencies): Manipur Police Commando temi Lilong nung arishi küm 26 tain tebur ka ket nung mozü bena lia apu.

Osang tejangja ka angazükba sülen Thoubal district police indang commando temi Lilongthong Ahanbi Ubakthong nung Honibar nikongdang mita ao.

Idangji parnok temulung melemba nisung ka apu aser pa ket nung plastic bag ka nung Samplex Plus capsules 2,784 bena liasü.

Iba nisung ya Lilong nunger Makamayum Asmakhan (Ashlambi) ta jangjaogo aser Narcotic Drugs and Psychotropic Substances (NDPS) Act kübok pa apu.

Pai mozü shibelener aser tawa tu ozüngi memelaba mozü bener arua ayok ta osang angazüker.

Lilong Turel Ahanbi nung MM Lakhimuddin ta ser nisung kati mozüji agütsür ta commando temi osang metet saka parnok Lakhimuddin'er kidangi aodang pa jena oadoker liasü.



Tripura Chief Minister Prof Dr Manik Saha-i Honibarnü Rashtrapati Bhavan, New Delhi nung India President Droupadi Murmu den ajurutepeba angur. Tripura CM-isa New Delhi nung BJP national president Jagat Prakash Nadda, union Defence minister Rajnath Singh, union Finance minister Nirmala Sitharaman, Meghalaya Chief Minister Conrad K Sangma aser Deputy Chief Minister Prestone Tynsong nunger den ajurutepeba liasü.

Cyclone Freddy agi Mozambique nung tanaben kongshir

Maputo, Metsüremi/March 12 (Agencies): Hopta ana tsingta Cyclone Freddy ajanga Mozambique nung tanaben kongshia nisung ka takum samatsüogo, kilem shizüka bener ao aser rongnendak jila ka nung lockdown benoktsüsa akum.

Freddy yipru ya cyclone talangtiba akumtsü jenjang ka nung lir, koba ajanga southern African tükum nung tzünglu tesashi aruba sülen Honibar aonung 10:00 ako nung tükum nung kongshia liasü.

February 6 nü Indonesia anasa anguba sülen iba cyclone yagi Mozambique nung tanaben kongshir. Taoba mapang iba yipru yagi nisung 27 takum samaja liasü.

United Nations Office for the Coordination of Humanitarian Affairs (OCHA) ajanga ashiba agi, Freddy ya Mozambique nung central Zambezia province kübok Quelimane district nung tropical cyclone ka ama arua kongshia liasü.

Zambezia aser anasa aliba Nampula province nung tüzümsüng adoktsü akok ta ashir. Ayong kar nungbo tzü ya 'alert level' alemogo.

State broadcaster TVM ajanga ashiba agi, ki ka chirepa nisung ka asü aser

tekumdangtsü mera agiba ama power shibangogo. Tayimtsü ajak thinena lir.

Yipru tükum tonga arutsü lia Quelimane jila nung lockdown benok, ta yangji alirtemi ashi.

"Jila ya no-go zone lir. Dokan mesüra businesses kecha melapok. Ajak shibanga lir. Onok shibanga lir. Ki kar nung kilem shisar, kijiba raksar aser yimtung nung tüzümsünga aliba nguogo," ta yangji alir kati ashi.

World Meteorological Organization ajanga ashiba agi Freddy ya southern Indian Ocean nung anogo 34 shi longzua liasü, koba tropical cyclone talangtiba akumtsü lir. Tesüiba mapang record yanglua aliba ya 1994 küm anogo 31 yipru aitiba liasü.

February ita mezüng hopta northwestern Australia nung kumtetba sülen Freddy ya southern Indian Ocean ajanga aru aser February 21 nungi Madagascar nung kongshi aser February 24 nü Mozambique atong.

Taoba ita iba yipru yagi southern Mozambique nung kongshidang nisung 171,000 dak tema nem timtem agüja liasü, kong tzünglu kanga sashia aruba aser tüzümsüng agi alu aser ki raksaja liasü. Iba yipru yagi Mozambique nung nisung ter

aser Madagascar nung nisung 17 takum samatsü, ta OCHA ajanga ashi.

Iba zülen Freddy ya Madagascar tsütsüi meyipa ao aser ano maneni Mozambique tsütsüi aru.

Tang Mozambique nung nisung million tesadang ka dak tema lendong nung lir, talisa Zambezia, Tete, Sofala aser Nampula province nung.

UNICEF atema odongtar Guy Taylor-i ashiba agi, cyclone ya alinük tonga arutsü anasa tüzümsüng adokdaksür liasü.

"Nisung aliba ki nung temokok tashi tzü atsinga aliba onoki nguogo. Aser ibaji tzünglu aru tüzükba mapang liasü," ta pai Quelimane nungi ashi.

Tüzümsüng asendenshir adokba ajanga saksü-pokshi tali kumdaktsütsü, koba agi September ita nungi tüzüka nisung 38 takum samatsüogo aser nisung 8,000 jungnüa menepa liasü.

Iba tashidak yagi saksür aser tepok odaktsür, koba chiyongtsü mesüra tzü tamajung nungi menateper.

Freddy yagi northeastern Zimbabwe, southeast Zambia aser Malawi nung kongshitsü imlar, ta United States National Oceanic and Atmospheric Administration ajanga ashi.

Alima nung tüzüngsang-mopung melenshia aoba ajanga yipru tuluba, tesashiba aser tashi taitba kumdaktsür, ta scientist temi ashir.

Greenhouse gas adokba nungi tüzüim temi tatsük timba atsüoker aser tüzüim tzü talem tango akumdang tatsük indang tashi ya atmosphere dangi yoka yipru tesashiba kumdaktsür.

Imran Khan-i nübuyimtsü sangdongba sülen Lahore nung curfew benok

Lahore, Metsüremi/March 12 (Agencies): Taoba ato kilonser Imran Khan-i Punjab yimtiba Lahore nung par Pakistan Tehreek-e-Insaf (PTI) election rally alitsü sangdongba sülen iba yimti nung Section 144 benokogo.

Punjab sorkari yimti nung lokti tulu adenshiba nokdanga lir. Lendong majurutsü mechi Section 144 ya benok, ta Punjab sorkari ashir.

Deobar nikongdang 2:00 ako nungi rally agitsü lia jelia mera agiba nung shilem ka ama Lahore nung Section 144 ya benok, ta ashi.

Lahore nung pai anir rally ka agitsü ta PTI tekolakbai sangdonger ghonda ishika lir iba tenokdangba ya agitsü. Iba party election rally agitsü lia sorkari tenokdangba agitsüba ya hopta ka majungdang tain agi tanabuba alitsü.

Ita pezü dak tali nung Deobarnü rally ya Imran Khan asoshi mezüngbuba alitsü, koba par Zaman Park kidang nungi animesor. Taoba Pakistan ato kilonser ya taoba küm yiruba sülen kodang temang anepalua amunger.

Yimti nung PSL match asayatsü aliba ajanga khuret balala aliba mangatetra Section 144 ya benoktsüsa akumtsü, ta deputy commissioner-i PTI dang tekumdangtsü shia liasü.

Par party rally ka nung police den raratepba mechi

police temi Imran Khan aser dangar nisung 400 anema nisung tepsetba aser kiralongraba ken o Brehostibarnü benoka lir, kong activist ka asü aser aika yirua liasü.

Tel Aviv, Metsüremi/March 12 (Agencies):

Sorkari judicial system melenshitsü sentong yangluba anema Israel nung meyirejang aikati longkak aitogo aser longkak aitiba sentong ayongertemi ashiba agi, iba ya Israel puti otsü nung yimtung nung longkak aitiba sentong tulutiba lir.

Ato Kilonser Benjamin Netanyahu-i ashiba agi, iba temelenshi bener aruba ajanga court tem indang tashi azüoktsü aser iba ajanga sorkar kongsang balala liromedema kümdaktsütsü.

Ajisüaka sorkar anemertemi ashiba agi, iba ajanga democracy amokmerener.

Honibarnü longkak aitiba sentong ka nung opposition lenir Yair Lapid-i ashiba agi, iba ya Israel nung mepetmesü tulutiba lir.

Tanga tatalokba ka nung Israel nung sepaitemi West Bank kübok Nablus yimti anasa Palestine nung asem Deobarnü khasetogo, ta Israeli army-i ashi. Nisung asem yagi Israeli army post ka dak injang

khalokja liasü.

Palestine nung ketdangsurtemi iba tatalokba dak sendakba nung telangzüba kecha magütsü, ajisüaka tawa Palestine aser Israel na tsüngda mangatetep tali adoka arudar.

Longkak aitiba sentong ayongertemi ashiba agi, Honibarnü Israel kübok tesem balala nung nisung 500,000 shi-i shilem agiogo, koba Haaretz osang kaketi ashiba agi linük puti otsü nung longkak aitiba sentong tulutiba liasü.

Tel Aviv nung longkak aiter 200,000 shi adenshia liasü aser parnok aikati Israel indang wako bener liasü.

Longkak aiter Tamir Guytsabry-i Reuters dang ashiba agi, "iba ya judicial temelenshi ka masü. Iba ya revolution ka lir aser iba ajanga Israel ya dictatorship kümdaktsütsü aser ni ozü tanurtem atema Israel ya democratic linük ka dang sudaktsüner."

Police tekolakba Amichai Eshed-i longka aita aliba

Mulungnen O



Asür LIPOK JAMIR (Khensa) kibong aser kinungertem ajaki pa manemi temang anepalua yariba mapang nungi tenzüker akümüli wadang March 09, 2023 anogo tembanga aruba tashi nung pur medemsor, külem tenzükertem, kidang-kimang, arogotem, doctor-tem, nurse-tem aser külemi alir kiyong kinar shirnokisa temulung taroktiba nungi pei nübu, ali rongsen den shisatsü aser sarasadem agi bendanga agüja yaritepogo, nenok ajak dang pelar. Nenok temeim mapa tajung asoshi asen Teyanglur dang maneni moajang ta onoki sarasademtsür.

LIVINGSTONE FOUNDATION INTERNATIONAL
THAHEKHU / KEVIJAU, DIMAPUR - 797112 NAGALAND

2023 ADMISSION OPEN NOW FOR SCHOOL
PREP-I TO GRADE-IX & GRADE - XI
■ ARTS
■ COMMERCE
■ SCIENCE

ENROL NOW

WHEN YOUR CHILD'S FOUNDATION IS STRONG, THEY ARE PREPARED TO FACE THE WORLD

- Forms available between 9:00am and 2:00pm at the LFI Accounts Section.
- 100% Concession for Grade-XI in both Hostel & School Fees will be granted to Top 10 Rankers from recognized Boards.
- 25% Concession for Grade-XI in both Hostel & School Fees will also granted to students with excellent flair in Sports, Art, Music & other such skills.

FOR COLLEGE
BA & B.COM - 1ST SEMESTER

JOIN US ON SOCIAL MEDIA
 livingstone.nagaland@gmail.com
 livingstone.nagaland.com
 livingstone.nagaland

CONNECT WITH US
 03862 - 244203 / 244302
 +91 70 05 99 60 92
 +91 70 05 99 60 93

"WE BELIEVE IN ALL ROUND & HOLISTIC DEVELOPMENT OF A CHILD"

Israel nung nüburtemi sorkar anema maneni longkak aiter

tesem adena aoba mapang longkak aiter pa teka malokja agizüka liasü. Netanyahu-i aniba sorkari district commander ya mapa nungi agintsü atema asüngdang ajisüaka iba jenjang agiba ya linük indang attorney general-i nokdanga liasü.

Honibarnü Haifa yimti nunga otsüsütsüsa longkak aiter 50,000-i shilem agia liasü. Sorkar sentong anema linük ajunga nung hopta 10buba atonga nüburtemi longkak aita arudar.

Be'er Sheva yimti nung jembiba mapang Lapid-i, linük nung tang mepetmesü tulu adoker lir.

"Kiralongrartemi onok dak kongshiogo, onok indang rongsenketzüng chirepdar, linük nungi sen tugudar. Iran aser Saudi Arabia na yashi tenangzüktepba ka yangluogo. Ajisüaka iba sorkar yagi Israel nung democracy raksatsü dang meranger," ta pai ashi.

Iba temelenshi ajanga sorkar nem obendanger shimba nung tashi tali

agütsütsü aser Supreme Court-i executive anema obendang agütsüba mesüra legislation magi kümdaktsüba tashi ajemtsütsü meranger.

Iba ken o ajanga Israel nung loktitentet lemdangogo aser sepaitemia iba sentong anemba temaitsü linük metenzüktsü amokmerena liasü.

Taoba Hombarnü elite Israeli Air Force squadron ka nung reserve fighter pilots temi parnok training-i marutsü ta ashi. Iba sülen mapang tatsüka lir parnoki parnok telemtetba melenshia training nung shilem agitsü mulunga agizük aser commander tem den sensaksema liasü.

Brehostibarnü longkak aitertemi Netanyahu linük toktsür modaktsütsü atema lenmang nokdanga liasü. Ajisüak pa mapang tatsüka lir Rome-i ao.

Nüburtemi longkak aitaka sorkar masetshi lir aser ashiba agi, yimden yimsüsüba tsütsü parnok anemertemi longkak aitertem rongmesor.

26buba AIFSM nung Nagaland team-i shilem agi



26buba All India Forest Sports Meet nung Forest Department, Nagaland nungi asayartemi shilem agiba mapang tangokba noksa nung angur.

Dimapur, Metsüremi/March 12 (TYO): Küm 25 shi sülen Nagaland, Forest Department 26buba All India Forest Sports Meet (AIFSM) nung shilem agiogo. Iba asayamung ya Panchkula, Haryana nung March 10 nü tenzükogo aser 14 nü tembangtsü.

Linük kübok tesem balala nungi Forest personnel 2400 shi-i anogo pongu asayaba asayamung nung shilem agidar. AIFSM ayongzüka asayatsü atema apitetba sülen 1993 küm mezüngbuba Hyderabad nung asaya aser iba sülen küm shia asaya arudar.

AIFSM nükjidongji state, Union Territories tem aser Central Governmen nungi Forest Department / organizations/institutions staff aser ketdangsürtem yongtsü

nung saisapong ajungkettsü atema lir aser iba ajanga anema alitsü atema ajungmesoba den team spirit adokdaksür aser kati ka taoba ta züngshitepa kümdaksür.

Iba asayamung nung track aser field events densema athletic tetoktepba, archery, rifle shooting aser tang saisapongtem ayongzüka asayar.

Taküm Nagaland nungia nisung teri badminton, table tennis, carom, sprint, chess, powerlifting, rifle shooting, aser quiz tetoktepba nung shilem agiogo.

AFISM nung shilem agitsü nüngdakba ya mapang talang ka nungi bilema aruogo. PCCF & HoFF, Nagaland-i achaayanga Department-i mapang talangka nungi shilem

agitsü aser asayartem sempet sayatsü atema bilema aliba asasang nung atalokogo, koba state atema meraket ka lir.

Maneni linük nung tanga state tem den jangyu medema iba asayamung nung shilem agitsü atema inyaktsüla, kechiyong asen state dang iba asayamung nung mapang talangka shilem magi aruogo. Iba ajanga forest personnel tema taküm libaliro azüoka alitsü aser health anepalutsü atema inyakdaksüba dang masü kati ka taoba ta züngshiteptsü atema tanüla adokdaksütsü aser pan India event ka nung shilem agiba ajanga ketdangsür aser staff tem peisasa dak tali temulung lema kümdaksütsü, ta ketdangsür sangdong ka ajanga metetdaksü.

Shreyas Iyer teberem agi timtem agütsür; ODI masayatetsü akok

Metsüremi/March 12, 2023 (Agencies): Shreyas Iyer teberem majungba ajanga timtem agütsüba agi Australia den tang asaya aliba tatabangbuba test nung India team atema tebilemtsü ka adokogo aser iba ajanga March 17 nü nungi tenzüksü aliba ODI asayamung nunga pa asayatetsü masayatetsü mejangjai kümogo.

Deobarnü India atema mezüngbuba inning nung Iyer batting ameni madok aser pa diagnostic scans atema anir ao.

Taküm küm atema India nung asayatsü aliba ODI World Cup ya asayamung ajak rongnung tongtibangtiba lir aser Shreyas lenisüba nung KKR pur IPL nung asayatsü lir asünung pa mapang tatsüka anisüngzüktü atema tetuyuba agütsütsü akok.

"Tasembuba anogo asayaba sülen Shreyas Iyer-i teberem nung tashiba ka aliba metetdakja liasü. Pa scan agitsü atema ogo aser BCCI Medical Team-i pa asadangdar," ta

BCCI-i sangdong ka ajanga metetdaksü.

Deobar anepdang Ravindra Jadeja (28) out asüba sülen Iyer melena wicketkeeper-batter Kona Bharat batting ameni adokba ajanga pa temang nung timtem aliba jangja aküm.

Nagpur nung mezüngbuba test asayaba mapanga teberem nung timtem aliba ajanga Iyer masayatet ajisüaka pa Delhi nung tanabuba test asaya nungbo shilem agiogo.

Iba ajanga NCA-i kodaser temang manemi aliba asayar ka asayatsü atema temelaba agütsü ta tasüngdangba adoker.

Osang ajanga ashiba agi, Iyer temang nung timtem ya Honibarnü adok aser iba ajanga Ravindra Jadeja No. 5buba nung batting ameni yok.

Deobarnü asayar ya ground-ia dena maru kechiyong pa batting amentsüsa jenjang ka nung maliasü.

"Australia nung batting amenba mapang over 170 dak tema fielding amenba sülen pa tanaben yirushi asütsü akok.

Ajisüaka kechiba domestic game ka asayar külenang asayadaksütsü asoshi inyakyim benoker aliba ya Iyer atemabo mamshi," ta taoba mapang national selector kati PTI dang ashi.

Iyer Nagpur Test nung masayatet aser Delhi Test asayatsü lia pa temang anema kümogo ta sangdong aser pa Delhi aser Indore naprongla nung asayaogo, ajisüaka iba test ana nungbo Ahmedabad nung asayaba amabo kanga belemabo masaya.

Iyer January ita mezüng teberem nung timtem adok aser pa ita ka tashi masaya aser National Cricket Academy (NCA) nung tema anepalua liasü aser pa anepba mapang tashi nungbo Ranji Trophy season tembangatoker liasü.

"Ajisüaka Irani Cup asayatsü liasü anungji Iyer Irani Cup nung asayadakja tatsük nung anogo ana tashi fielding amenba pa temangi tizüker metizüker aji asadang nung jungla," ta selector yagisa ashi.

IKF-i tetsür Kabaddi League atema temelaba magütsü

Metsüremi/March 12, 2023 (Agencies): International Kabaddi Federation (IKF)-i ashiba agi, parnoki Women's Kabaddi League ayongzüka asayatsü atema Pro Kabaddi ayonger Mashal Sports nem temelaba magütsü.

March 2 nü PKL ayonger Mashal Sports-i sangdong ka ajanga Amateur Kabaddi Federation of India aser International Kabaddi Federation (IKF) den longjemer women's kabaddi league ayongzüka asayatsü sentong aliba metetdakja liasü.

Mashal Sports, CEO aser Pro Kabaddi League, League Commissioner Anupam Goswami-i, "professional women's kabaddi league ka tenzüksüba ya tebur league kanga takok ngua asayaba aser kabaddi ya India nungi world-class asaya kümä renlokdaksütsü onok bendanga agütsür aliba tejakdangi bener aotsüba dak ajemdaker lir. Onoki women's league amenoktsü atema Amateur

Kabaddi Federation of India (AKFI) aser International Kabaddi Federation (IKF) densema tanga stakeholder tem den longjemer inyaktsü," ta ashi.

IKF secretary general Satthasivam Munisamy-i IANS dang ashiba agi, Women's Kabaddi League atema Mashal Sports mesüra Star Sports nem kecha temelaba magütsü aser iba atema board-i telemtetba agitsü.

"Onoki tang tashi nung shinga nema temelaba agüja mali. Onoki tatsüka lir metetdaksütsü akok saka tangbo memetdaksütsü. Ni tir aser board den sensaksemba sülenang metetdaksütetsü. Tang tashi nungbo onoki Women's League mesüra World cup asayatsü atema temelaba agüja mali," ta IKF secretary general Satthasivam Munisamy-i ashi.

"Onoki temelaba agüja mali aser iba atema sensaksemba khen danga magi. Board senden amenba sülen metetdaksütsü," ta paisa ashi.

Iga Swiatek Indian Wells 3buba round-i iogo



final tonga asayaogo.

Kasa asayamung tebur kija asaya nung defending champion Taylor Fritz, shibai taoba küm final nung Rafael Nadal tsükdakja liasü pai 4-6, 6-4, 6-3 agi kanga meranga asayar Ben Shelton madak takok nguogo.

Maneni Canada nung asayar Felix Auger-Aliassime aser Jannik Sinner nata tasembuba round-i iogo. Aliassime-i 7-6 (7/5), 6-4 agi Spain nung asayar Pedro Martinez akok aser Sinner-i France nung asayar tejen Richard Gasquet 6-3, 7-6 (7/2) agi koka liasü.

Taoba mapang world number one asayar Andy Murray-ia lucky loser Radu Albot 6-4, 6-3 agi koka taküm mezüngbuba straight-sets nung asaya ka kokogo.

Tasembuba round nung Murray, Jack Draper den asayatsü shibai Daniel Evans 6-4, 6-2 agi kokogo.

Tetsür asaya nung France tsür Caroline Garcia-i Hungary tsür Dalma Galfi 6-1, 6-7 (4/7), 6-4 agi kokogo aser la Canada tsür Leylah Fernandez den asayatsü, shibai America tsür Emma Navarro 6-2, 6-4 agi koka liasü.

Indian Wells asayamung anaben tashi koker alila Victoria Azarenka 7-6 (7/1), 6-3 agi Karolina Muchova-i tsükdaksüogo. Tetsür kija asaya nungsa Emma Raducanu-i Australian Open semi-finalist Magda Linette 7-6 (7/3), 6-2 agi kokogo.

Metsüremi/March 12, 2023 (Agencies): World number one asayar Iga Swiatek-i Indian Wells asayamung tanabuba round nung America tsür Claire Liu 6-0, 6-1 agi koka tasembuba round-i iogo.

Iba asayamung ya WTA & ATP Masters 1000 hard court tournament ka lir aser Martina Navratilova-i 1990-91 küm iba asayamung atonga akokba sülen Swiatek-a iba asayamung atonga akokba asayar tanabuba akümtsü merangdar.

Swiatek-i mezüngbuba set nung point 32 nungi 25 nguteta liasü.

Tanabuba set nunga lai kanga ayonga asaya aser la indang serve ka danga break mesüdaksü, ajisüaka Liu-i match point ka kümzükteta la indang service game ka koka liasü.

January ita tia maka Australia Open round of 16 nung tsükba sülen Warsaw nungi arishi küm 21 tain asayar yagi Doha nung la indang title defend süogo aser Dubai nunga

BILEMDANGANG

"Temoatsüa süang khureta süang teti atema masü."